

Trabou di restauracion ta inicia e siman aki riba Cas Veneranda

DURANTE un evento di Monumentendag, a habri porta di Cas Veneranda brevemente pa un publico presente. Organisa pa Stichting Monumentenfonds, arkitecto Daphne Every a duna un presentacion di e historia di Cas Veneranda, y un splicacion di e trabounan cu ta bai haci cuminsando e siman aki.

Despues di basta preparacion, cuminsando e siman aki lo cuminsa mira actividad na Cas Veneranda.

E prome paso den preparacion tabata e firmamento di e koopovereenkomst cu e famia di e doño original y firmamento di e huurovereenkomstnan. Departamento di Asuntonan Economico, Comercio y Industria (DAECI) lo ta e hurdo principal, y tambe lo tin un establecimiento di horeca den e pida na banda di Schoolstraat.

E ubicacion di DAECI den centro di Oranjestad ta pa trece bida bek centro a traves di amplifica e fluho di personanan cu ta frecuenta e area. Esaki ta importante pa realisa e revitalisacion di Oranjestad.

Por mira diferente otro proyectonan caminda a restaura edificionan y ubica departamentonan den e centro di ciudad, manera Freezona na Plaza Nikki Habibe, y Aruba Fair Trade Authority (AFTA) den Oranjestraat.

Entre otro tin diferente proyectonan den planificacion cual pronto mester cuminsa, manera e edificio di Ministerio

Publico cu ta bay ser converti den vivienda pa estudiante, y edificio di ex-Interbank caminda lo haci trabounan di renovacion, y lo ubica Bureau Intellectuele Eigendom (BIE) y SEDECO den dicho edificio.

Ta tumando pasonan concreto dentro di su control pa por mehora e clima empresarial den e area, y ta musta cu sector priva tambe ta siguiendo e pasonan aki cu inversi-onnan cuantioso den ful e area di Oranjestad.

E minister encarga cu e proyecto aki, a indica di ta contento cu despues di tanto tempo y trabou incansabel di preparacion, cu e siman aki lo cuminsa e parti di restauracion mes di Cas Veneranda. E trabou di restauracion ta plania pa cuminsa di 23 di september, y lo termina fin di november 2025.

